

## PREDGOVOR

Udžbenik “Forenzičke – istrage II” nastao je kao potreba studenata za uspješno praćenje i polaganje istoimenog ispita na Pravnom fakultetu Univerziteta “Apeiron” u Banja Luci, a u sklopu II ciklusa studija (ranije definiranog kao postdiplomske studije). Dakle, na ovaj način je nastavljena izvanredna praksa navedenog pravnog fakulteta (Univerziteta) da za svaki svoj predmet omogući izdavanje odgovarajućeg udžbenika koji studentima umnogome olakšava savladavanje predviđenog gradiva.

Koncepcija nastavnih planova i programa Pravnog fakulteta pri Univerzitetu “Apeiron” u Banja Luci, između ostalog, podrazumjeva egzistiranje Opšte – pravnog studijskog programa u sklopu koga se nalazi Kriminalističko – forenzički modul. Upravo u tom modulu određeno je nekoliko izbornih predmeta, među kojima se posebno ističu: “Osnove forenzičkih nauka” i “Forenzičko – kriminalističke istrage” (koji se, na različite načine, međusobno nadopunjuju i isprepliću). Udžbenik za predmet “Osnove forenzičkih nauka” objavljen je prije dvije godine, i pokazao se od velike važnosti i koristi studentima ovog modula. Početkom 2013. godine odštampan je i udžbenik (“Forenzičko kriminalističke istrage i odabrana poglavlja pravne medicine”) za predmet “Forenzičko kriminalističke istrage”, za redovni studiji (I ciklus), kao i udžbenik “Forenzičke nauke II i odabrana poglavlja pravne medicine” za drugi ciklus studija u predmetu Forenzičke nauke..

Dakle, pošto ovaj program, odnosno modul podrazumjeva i master studije, dakle nastavu i polaganje ispita iz ovih predmeta na višem stepenu studija, mi smo se postarali da u tom smislu koncipiramo nastavne planove i programe navedenih predmeta, ali i da obezbjedimo udžbenike za iste (što upravo i činimo ovim udžbenikom), kako bi studenti imali optimalne uslove za praćenje nastave, odnosno polaganje ispita.

Udžbenik “Forenzičke – istrage II” je prvi ove vrste na našim prostorima i on koncepcijski u potpunosti prati nastavni plan i program ovoga predmeta, koji je koncipiran u smislu potpunog sagledavanja nastavnih cjelina predmeta na drugom ciklusu studija. Upravo zbog toga, njegov sadržaj je pomalo i neobičan (iako predstavlja specifično planiranu cjelinu) i tek posmatrano sveobuhvatno, sva četiri nastavna plana i pro-

grama (dva na prvom ciklusu studija i dva na masteru/ II ciklus) dobija se jedna potpuno zaokružena cjelina, koja se opet sastoji iz četiri brižljivo dizajnirane zasebne cjeline.

Jedna od specifičnosti ovog udžbenika jeste i jezik pisanja. Naime, neke cjeline su pisane isključivo naučnim jezikom, dok su neke cjeline obrađivane na potpuno jednostavan (stručan) i jasan način, tako da se takva konceptijska šarolikost prožima u cijelom sadržaju.

Istovremeno, koristimo ovu priliku da se zahvalimo svima onim koji su nam na bilo koji način pomogli u toku pripreme navedenog udžbenika, a posebno onima iz čijih smo radova crpili odgovarajuće podatke ili prenosili odgovarajuće djelove u cjelini. Svima njima, a i onima koje nismo spomenuli veliko hvala.

Autori